

Kukaa Ndani ya Kristo

Kaeni ndani yangu, nami ndani yenu. Kama vile tawi lisivyoweza kuzaa peke yake, lisipokaa ndani ya mzabibu; kadhalika nanyi, msipokaa ndani yangu—**Yohana 15:4.**

“Kaeni ndani yangu” ni maneno yenye umuhimu mkubwa. Kukaa ndani ya Kristo humaanisha imani iliyo hai, ya bidii na iburudishayo ambayo hutenda kazi kwa upendo na kuitakasa nafsi. Inamaanisha upokeaji endelevu wa Roho wa Kristo, maisha yaliyosalimishwa kikamilifu kwa huduma Yake. Mahali ambapo muungano huu upo, matendo mema yatatokea. Maisha ya mzabibu yatajidhihirisha yenyewe katika tunda lenye harufu nzuri matawini. Utoaji endelevu wa neema ya Kristo utakubariki na kukufanya kuwa baraka, hata utakaposema pamoja na Paulo, “Nimesulibiwa pamoja na Kristo; lakini ni hai; wala si mimi tena, bali Kristo yu hai ndani yangu” (Wagalatia 2:20).

Muunganiko Mtakatifu pamoja na Kristo utawaunganisha ndugu katika vifungo zaidi vya upendo wa ushirika wa Kikristo. Mioyo yao itaguswa na huruma ya Mungu kwa kila mmoja wao.... Kudharauliwa, kutofautiana, mabishano, yanaondoka kabisa miongoni mwa wanafunzi wa Yesu. Wameikubali imani moja. Wameshikamana ili kumtumikia Bwana mmoja, kustahimili katika vita moja, kujitahidi kwa ajili ya lengo moja na kushangilia katika kusudi moja. Wamenunuliwa kwa damu ile ile ya thamani na wamesonga mbele kuhubiri ujumbe ule ule wa wokovu....

Wale ambao daima wanachota nguvu kutoka kwa Kristo Yesu watakuwa na Roho Wake. Hawatakuwa wazembe katika Neno wala mwenendo wao. Utambuzi wa kudumu wa jinsi ambavyo wokovu wao umegharimu katika kafara ya Mwana mpendwa wa Mungu utatulia juu ya nafsi zao. Kama vile kumbukumbu mpya na Dhahiri mandhari ya Kalvari yatajiwasilisha yenyewe akilini mwao na kisha mioyo yao itatiishwa na kufanywa kuwa myororo kwa onesho hili la ajabu la upendo wa Kristo kwao. Watawaangalia wengine kama watu walionunuliwa na damu Yake ya thamani na wale ambao wameunganishwa na Yeye wataonekana kuwa wanyofu na walioadilishwa na waliotakaswa kwa sababu ya muunganiko huu. Kifo cha Yesu Msalabani kinapaswa kutuongoza kuzichukulia roho kama Alivyofanya. Upendo Wake umezidisha thamani ya kila mwanamume, mwanamke na mtoto.